

Buruh maut ditimbus tanah gelungsur projek Lebuhraya Lingkaran Tengah

Oleh Amir Hamzah Nordin - Disember 11, 2023

Lipis : Seorang buruh binaan maut dalam kejadian tanah gelungsur di tapak Projek Lebuhraya Lingkaran Tengah Utama (SCR) yang terletak di Kampung Berembang dekat Padang Tengku di sini, hari ini.

Dalam kejadian jam 11.15 pagi tadi, mangsa yang terbunuh, Khairul Anam, 28, berasal dari Jawa Timur, Indonesia, baru lima bulan bekerja di tapak projek itu.

Ketua Polis Daerah Lipis, Superintendan Azli Mohd Noor, berkata mangsa tertimbus ketika jentera ekskavator berhenti kerja sebelum mangsa turun ke kawasan dalam longkang yang digali untuk mengukur kedalaman kira-kira 2.5 meter dan lebar 1.6 meter.

"Secara tiba-tiba tanah menggelungsur lalu menimbus mangsa. Ada tiga pekerja lain yang berada di situ segera turun membantu dan mengorek tanah tertimbus lebih kurang 15 minit dan membawa mangsa naik ke atas.

"Pegawai perubatan yang dikejarkan ke lokasi, mengesahkan mangsa meninggal dunia di tempat kejadian sebelum mayatnya dihantar ke Unit Forensik Hospital Lipis untuk bedah siasat," katanya.

Sementara itu, ketua operasi dari Balai Bomba dan Penyelamat (BBP) Kuala Lipis, Ariffa Mamat, berkata mangsa yang tertimbus berjaya dikeluarkan rakan sekerjanya dengan menggunakan jentera berat.

"Seramai 8 anggota dari Balai Bomba dan Penyelamat (BBP) Kuala Lipis tiba di tempat kejadian turut membantu mengeluarkan mangsa," katanya.

-Berita Harian